

## IZJAVA DANA



U jednom trenutku, šaljući nam poruku i nauk zauvek, priroda traži od nas da sarađujemo, da se u nedaći ujedini, da pokažemo solidarnost kao jednu od svojih najljepših osobina

**Tomislav Nikolić,**  
predsjednik Srbije

## DOBAR LOŠ ZAO



### NERMIN NIKŠIĆ

Federalni premijer Nermin Nikšić nije mogao obradovati penzionere. Od povišice mizernih penzija nema ništa, a do kraja godine isplate će biti najkasnije do 10. u mjesecu. Nikšić je pošteno izašao pred penzionere i rekao im da neće davati lažna predizborna obećanja o povećanju penzija kada za to nema osnova. Za palac gore, ipak, potrebna je povišica.

### TONINO PICULA

Hrvatski zastupnik u Evropskom parlamentu Tonino Picula novoj šefici evropske diplomatije Federichi Mogherini skrenuo je pažnju na Bosnu i Hercegovinu. Srećom, veli on, BiH nije problem veličine odnosa Ukrajine i Rusije, ali je i dalje važan test za primjenu zajedničke evropske vanjske i sigurnosne politike.



### JAGO LASIĆ

Predsjednik Privredne komore Federacije BiH Jago Lasić iznio je niz teških optužbi na račun vlasti zbog loše ekonomske politike, što je rezultiralo deficitom koji se mjeri u milijardama maraka i nezaposlenošću od 40 posto. Poručio je i da bi se Vijeće ministara BiH napokon trebalo početi baviti svojim poslom - vođenjem države.

### OMLADINSKI TIM

Omladinska reprezentacija Bosne i Hercegovine dostojno je predstavila naš sport na Drugim olimpijskim igrama mladih u kineskom Nanjingu. Najveći uspjeh ostvarila je džudistkinja Aleksandra Samardžić, članica kluba Nippon iz Sarajeva, koja se okitila srebrenom medaljom. Nastup naših mladih sportista pohvalio je i predsjednik Olimpijskog komiteta BiH Siniša Kisić.



### VIJEST U BROJU

# 266

poljoprivrednika u Zvorniku dobiće regresiranih 54.000 litara dizelgoriva za jesenje radove.

## Novi izvještaj DPC-a

# DODIK UMALO PROGLASIO NEZAVISNOST RS-a?

**Prema zapadnim diplomatskim izvorima, ruska aneksija Krima je ohrabrila predsjednika Republike Srpske da razmisli o konkretnim koracima koji bi rezultirali dugo najavljivanom secesijom i to uz rusku podršku. Da li će zbog toga NATO-trupe sa Kosova biti prebačene u BiH?**

Dok ekonomisti, kao Stephen H. Roach i J. Bradford Delong, upozoravaju da SAD-u i EU prijeti nova etapa recesije, koja vodi u kobno "stanje D", tj. ekonomsku depresiju, a ruski predsjednik oštrom retorikom nastoji olabaviti omču zapadnih sankcija i očuvati što je više moguće ukrajinskih teritorija u ruskoj orbiti, autori novog izvještaja Savjeta za demokratizaciju politike (DPC) Bodo Weber i Kurt Basuner tvrde da bi se utjecaj Rusije mogao protegnuti ozbiljnije na Balkan.

### Vučić spriječio secesiju?

Štoviše, u izvještaju pod imenom Zapadni Balkan i ukrajinska kriza - promjena američke i evropske politike stoji da ruski ekonomski utjecaj u Srbiji, a posebno u Republici Srpskoj, dugoročno ne isključuje imperijalističke ambicije. Najšokantniji dio je onaj o ponašanju predsjednika Republike Srpske Milorada Dodika u odnosu na druge političare u regionu:

"Države zapadnog Balkana su različito reagovala na ukrajinsku krizu. Crna Gora se u potpunosti svrstala uz evropsku politiku naspram Rusije, uključujući uvođenje sankcija. Vlada je preuzela rizik prekida sa svojim historijskim saveznikom Srbijom potiskujući tradicionalni proruski sentiment u dijelovima svoje političke elite i društva. Pa, ipak, ova je država ostala bez nagrade kojoj se nadala: odobravanja pristupa NATO-u na septembarskom samitu u Velsu. Razlog odluke NATO-a ostaje neja-

san. U Bosni i Hercegovini je ukrajinska kriza lokalnim političkim faktorima omogućila osnovu za osvježavanje postojećih pozicija. Prema zapadnim diplomatskim izvorima, ruska aneksija Krima je ohrabrila predsjednika bosansko-hercegovačkog entiteta Republika Srpska, Milorada Dodika, da razmisli o konkretnim koracima koji bi rezultirali dugo najavljivanom secesijom i to sa ruskom podrškom. Prema ovim izvorima, ovakav je razvoj događaja spriječila akcija srpskog premijera Aleksandra Vučića koji je Banjoj Luci uskratio podršku ukoliko izvrši takav potez."

Koliko je ovo moguće, s obzirom na geografsku udaljenost Rusije i okruženost RS-a Hrvatskom i bošnjačkim dijelovima

Federacije BiH koji na ovakav potez ne bi gledali nimalo blagonaklono, s obzirom na to da predstavlja direktno kršenje Dejtonskog mirovnog sporazuma? Autori rusku političku moć u regionu objašnjavaju energetskim projektima kao što je Južni tok, gasovod koji bi, zaobišavši Ukrajinu, dovođio ruski gas u Evropu i to linijom Anape (južna Rusija), zatim podu Crnog mora (kroz turske teritorijalne vode), do Varne u Bugarskoj, gdje bi se granao u dva pravca, jedan preko Grčke do Italije, a drugi preko Srbije i Mađarske do Austrije (sa jednim od krakova, koji bi, moguće, ulazio u BiH, to jest u RS).

### Južni tok

- Moj interes je da Srbija bude centar regiona, tranzitni region, da Srbija bude zemlja koja će zahvaljujući svojoj geostrateškoj poziciji ostvariti prihode. A zašto bi Nemačkoj bilo u interesu da zaustavi izgradnju Južnog toka kroz Srbiju? Nemačka je pored Turske najveći potrošač gasa, Berlin ima fantastične odnose s Moskvom, Nemačka ima Severni tok, izjavila je nedavno u intervjuu za beogradski Nedeljnik ministarka energetike Srbije Zorana Mihajlović.

Iako je Srbija poentirala da neće odustati od izgradnje gasovoda, ranije opstrukcije koje su se dogodile u Bugarskoj (zbog naloga Evropske komisije da se izgradnja mora odgoditi do usklađivanja sa evropskim propisima) bi početak radova mogle odgoditi za proljeće 2015, što bi Evropljanima moglo ostaviti prostora za manevrisanje.

**Vuk BAČANOVIĆ (Dani)**



**Aleksandar Vučić:**  
Autori izvještaja tvrde da je premijer Srbije zaustavio Dodikovu akciju

## VIJEST U OBJEKTIVU

Foto: Didier TORCHE

### Ženski sud BiH

Aktivistkinje Fondacije CURE su jučer organizovale uličnu kampanju ispred sarajevske Katedrale, čiji je cilj da doprinese podizanju svijesti kod građana i građanki BiH o položaju žena koje su preživjele ratna silovanja i torturu tokom rata. Ulična kampanja Ženskog suda BiH - zalaganje za prava preživjelih ratna silovanja realizovana je istog dana, u isto vrijeme, u sedam gradova BiH - Sarajevo, Tuzla, Zenica, Goražde, Modriča, Bijeljina i Bratunac. Sud je zasnovan na činjenici da ne postoji jedinstvena regulacija prava preživjelih seksualno nasilje tokom rata.

